

ტრამპის ტარიფების გავლენა საქართველოს ეკონომიკაზე

ენატე შამუგია¹

ტრამპის მეორე საპრეზიდენტო პერიოდი სავაჭრო ომის გაჩაღებით დაიწყო. პირველ ეტაპზე, ეს იყო აშშ-ის უმსხვილესი სავაჭრო პარტნიორებისთვის - კანადა, მექსიკა და ჩინეთი - საიმპორტო საქონელზე ტარიფების დაწესება². მოგვიანებით, ასეთივე პოლიტიკა დანარჩენ მსოფლიოზეც, მათ შორის, საქართველოზეც გავრცელდა. ტრამპის სავაჭრო ომამდე, აშშ განსხვავებული ტარიფით ბეგრავდა საქართველოდან იმპორტირებულ საქონელს³. ამერიიდან, დამატებითი ღირებულების 10%-ით დაიბეგრება.

საქართველოდან აშშ-ში ძირითადი საექსპორტო საქონელი ფეროსილიკომანგანუმი. 2024 წელს აშშ-ში 89.7 მლნ დოლარის ღირებულების ფეროსილიკომანგანუმის ექსპორტი განხორციელდა, რაც ამერიკაში ექსპორტირებული საქონლის მთლიანი ღირებულების 63.6%-ია.

¹ კვლევითი ინსტიტუტი Gnomon Wise, e-mail: e.shamugia@ug.edu.ge

² ტრამპის სატარიფო პოლიტიკის ეკონომიკურ გაუმართლებლობაზე იხილეთ: შამუგია, ე. (2025). ტრამპის სატარიფო პოლიტიკა - საფრთხეები და პოტენციური შედეგები. In *Gnomon Wise*. <https://gnomonwise.org/ge/publications/analytics/245>

³ ტრამპის სატარიფო პოლიტიკის ეკონომიკურ გაუმართლებლობაზე იხილეთ: შამუგია, ე. (2025). ტრამპის სატარიფო პოლიტიკა - საფრთხეები და პოტენციური შედეგები. In *Gnomon Wise*. <https://gnomonwise.org/ge/publications/analytics/245>

ცხრილი 1: საქართველოს ძირითადი საექსპორტო საქონელი აშშ-ში და აშშ-ს საიმპორტო განაკვეთი


საექსპორტო საქონელი	ექსპორტი, მლნ დოლარი (2024)	საიმპორტო განაკვეთი (05.04.2025 -მდე)
ფეროსილიკომანგანუმი	89,7	3,9%
შავი ლითონის მიღები	8,4	0,0%
საფრენი აპარატის ნაწილები	7,2	0,0%
ყურძნის ღვინო	7,0	19.8 ცენტი/ლ
სილიციუმი	5,4	0,0%
ხილის წვენები	4,5	0-0.64 ცენტი /ლ
არაყი/ჭაჭა/ვისკი	2,6	0,0%
დაწებებულ ფანერა	1,9	0-8,0%
მინერალური წყლები	1,7	0.26 ცენტი/ლ
კოსმეტიკური საშუალებები	0,8	0,0%

წყარო: სტატისტიკის ეროვნული სამსახური; აშშ-ის საერთაშორისო ვაჭრობის კომისია

აქამდე ამერიკაში ფეროსილიკომანგანუმის ექსპორტი მხოლოდ ღირებულების 3.9%-ით იბეგრებოდა. თუმცა ჯერ-ჯერობით გაურკვეველია, რამდენად შეეხება 10%-იანი სატარიფო განაკვეთი საქართველოდან ფეროსილიკომანგანუმის ექსპორტს, რადგან, დეტალიზაციის გარეშე, რიგ მინერალებსა და მეტალებზე გამოცხადებულია სატარიფო შეღავათები⁴. ამასთან, ფეროსილიკომანგანუმის საექსპორტო ბაზარი საკმაოდ დივერსიფიცირებულია (მაგალითად, თითქმის ორჯერ უფრო მეტი საქონელი გავიდა თურქეთში. ასევე, სილიკომანგანუმის ექსპორტი ხორციელდება ევროკავშირის არაერთ ქვეყანაში) და აშშ-ის წილი მთლიან ექსპორტში დაახლოებით 30%-ია. ეს იმას ნიშნავს, რომ აშშ-ის საექსპორტო ბაზრის სხვებით ჩანაცვლება მეტ-ნაკლებად შესაძლებელია. ამრიგად, აშშ-ში, ძირითად საექსპორტო საქონელთან მიმართებით, მოსალოდნელია ტრამპის სატარიფო პოლიტიკის უმნიშვნელო პირდაპირი გავლენა.

⁴ WSJ Staff. (2025). What products and which countries are exempted from Trump's tariffs? *Wall Street Journal*. https://www.wsj.com/livecoverage/trump-tariffs-trade-war-stock-market-04-03-2025/card/what-products-and-which-countries-are-exempted-from-trump-s-tariffs--qN2fmWrlFejrHBSVD8g5?utm_source=chatgpt.com


გრაფიკი 1: საქართველოდან ფეროსილიკომანგანუმის ექსპორტი აშშ-ში, ათასი ტონა



წყარო: სტატისტიკის ეროვნული სამსახური

რიგით მეორე საექსპორტო საქონელი შავი ლითონის მიღება, რომელიც შეიძლება მეტალების საგამონაკლისო სიაშიც მოხვდეს. 2024 წელს ამერიკაში ამ საქონლის ექსპორტის ღირებულება 8.4 მლნ დოლარია. მესამე საექსპორტო საქონელია საფრენი აპარატის ნაწილები. გასულ წელს აშშ-ში საფრენი აპარატის ნაწილების ექსპორტის ღირებულება 7.2 მლნ დოლარი იყო (თითქმის 40% რეექსპორტია). აქამდე ორივე ეს საქონელი ნულოვანი დაბეგვრის რეჟიმით სარგებლობდა.

გრაფიკი 2: საქართველოდან ყურძნის ნატურალური ღვინის ექსპორტი აშშ-ში, ათასი ტონა




წყარო: სტატისტიკის ეროვნული სამსახური

გარდა ჩამოთვლილისა, ამერიკა საექსპორტო ბაზარია ქართული ღვინისთვისაც. თუმცა ეს ბაზარი ღვინის ექსპორტიორებისთვის ნაკლებად მნიშვნელოვანია, რადგან ღვინის მთლიან ექსპორტში მხოლოდ 2.6%-იან წილს იკავებს.

2024 წელს განხორციელდა 7 მლნ დოლარის ღირებულების, ძირითადად, მაღალი საფასო კატეგორიის ღვინის ექსპორტი⁵. მიმდინარე პერიოდამდე, საქართველოდან აშშ-ში ღვინის შეტანა, ყოველ ლიტრზე, 19.8-ცენტის განაკვეთით იბეგრებოდა. აღსანიშნავია, რომ სხვა საქონლისგან განსხვავებით, ბოლო წლებში ღვინის ექსპორტს მზარდი ტემპი ახასიათებს. ეს კი შესაძლებელია, 10%-იანი განაკვეთის დაწესების მიუხედავად, აჩქარდეს, რადგან ამერიკულ ბაზარზე ღვინის ექსპორტიორი ძირითადი ქვეყნები ორჯერ უფრო მეტი განაკვეთით დაიბეგრება (ამერიკაში ღვინის იმპორტის 2/3 -ზე მეტი საფრანგეთისა და იტალიის წილია).

მთლიანად, 2024 წელს საქართველოდან აშშ-ში 141 მლნ აშშ დოლარის ღირებულების საქონლის ექსპორტი განხორციელდა. სწორედ ამ ექსპორტის ტარიფებით დაბეგრვა არის ის რისკი, რომელიც საქართველოს ეკონომიკას პირველ რიგში გაუჩნდა. ამასთან, გამომდინარე იქიდან, რომ აშშ-ში პროდუქციის ექსპორტი მთლიანი ექსპორტის მხოლოდ 2.1%-ია, ტარიფების გავლენა ექსპორტის მაჩვენებელსა და ეკონომიკაზე მნიშვნელოვანი არ იქნება.

გრაფიკი 3: საქართველოდან აშშ-ში მთლიანი ექსპორტი




წყარო: სტატისტიკის ეროვნული სამსახური; საერთაშორისო სავალუტო ფონდი

⁵ შამუგია, ე. (2020). ღვინის ექსპორტის ათწლედი: სად ფასობს ძვირად? *BMG*. <https://bm.ge/news/gvinis-egsportis-atwledi-sad-fasobs-dzvirad/71629>

რაც შეეხება იმპორტს, ექსპორტთან შედარებით, საიმპორტო საქონლის ღირებულება მეტია. 2024 წელს განხორციელდა 2 075.4 მლნ დოლარის ღირებულების საქონლის იმპორტი, რომლის უდიდესი ნაწილი მსუბუქი ავტომობილებია. ამ პერიოდში ამერიკიდან იმპორტირებულია 1 907.2 მლნ დოლარის ღირებულების ავტომობილები, რომელთა ½ -ზე მეტი რეექსპორტზე გავიდა. რეექსპორტირებული ავტომობილების საბოლოო დანიშნულება კი, ევრაზიული ეკონომიკური კავშირის ქვეყნების (ყაზახეთი, ყირგიზეთი და სომხეთი) გავლით, რუსეთია⁶.

გრაფიკი 4: საქართველოში მსუბუქი ავტომობილების იმპორტი აშშ-დან, ცალი



წყარო: სტატისტიკის ეროვნული სამსახური

ამერიკული ავტოინდუსტრია კი სწორედ ის მიმართულებაა, რომელზეც ტრამპის სატარიფო პოლიტიკის გავლენა მეტად თვალსაჩინოა⁷. კერძოდ, ნავარაუდევია აშშ-ში წარმოებული ავტომობილის ფასის საშუალოდ 2.7 ათასი დოლარით მატება⁸. თუმცა ეს ეხება ახალ ავტომობილებს, ხოლო საქართველოში, ძირითადად, მეორეული ავტომობილების იმპორტი ხორციელდება. მეორეული ავტომობილის ბაზარზე ცვლილებები შესაძლებელია, მაგრამ რაიმე კონკრეტული გავლენის პროგნოზირება ამ ეტაპისთვის რთულია.

⁶ შამუგია, ე. (2024). საქართველოს ექსპორტის დეკომპოზიცია. In *Gnomon Wise*.


<https://gnomonwise.org/ge/publications/analytics/184>

⁷ Contreras, J. (2024). *Restricting imports of Mexican vehicles will harm US manufacturers*. The Peterson Institute for International Economics. Retrieved February 6, 2025, from

<https://www.piie.com/blogs/realtimeeconomics/2024/restricting-imports-mexican-vehicles-will-harm-us-manufacturers>

⁸ Domonoske, C. (2025). *Trump pauses tariffs on Canada and Mexico. Here's why it matters to automakers*. NPR. Retrieved February 13, 2025, from <https://www.npr.org/2025/02/03/nx-s1-5285546/trump-tariffs-canada-mexicoautos>

გრაფიკი 5: აშშ-სთან საქართველოს სავაჭრო ბრუნვის ფარდობა მშპ-სთან



წყარო: სტატისტიკის ეროვნული სამსახური; საერთაშორისო სავალუტო ფონდი

ამერიკასთან საქართველოს საგარეო ვაჭრობის მოცულობა, ეკონომიკასთან შეფარდებით, მცირეა, ამიტომ ტრამპის სატარიფო პოლიტიკის პირდაპირი გავლენა შეიძლება უმნიშვნელო იყოს. უფრო მეტიც, ამერიკაში ექსპორტის სრული გაჩერების შემთხვევაშიც კი, დანაკარგი მცირე იქნება, რაც, მათ შორის, ექსპორტის კომპოზიციით არის განპირობებული. ამერიკასთან ძირითადი საექსპორტო საქონელი მეტალის კონცენტრატებია, რომლის ბაზარი საკმაოდ დივერსიფიცირებულია. მეორე მხრივ, ევროკავშირისთვის დაწესებული მაღალი ტარიფების გამო, დასაშვებია, რომ ქართული ღვინისათვის ამერიკულ ბაზარზე ახალი შესაძლებლობაც გაჩნდეს.

ამრიგად, ბევრი სხვა ქვეყნისგან განსხვავებით, საქართველო აშშ-ის ეკონომიკასთან მჭიდროდ დაკავშირებული არ არის, მიტომ მნიშვნელოვან რისკებს არც ახალი სატარიფო პოლიტიკა გააჩენს. თუმცა, ტრამპის სატარიფო პოლიტიკის ეფექტის ზუსტი პროგნოზირება მაინც შეუძლებელ ამოცანად რჩება.